

Jahresbericht vom Tanze 2013

Am 12.+13. Januar isch z Trachtetänzkurs Wochenänd zerscht mau z Lyss düre g'führt worde. Wüu si z'Lokau im Gwatt zu dere Zyt grad umboue hei. A däm Alass teilgnoe hei fuf Froue vor Tanzgruppe. Aui si begeisteret vo de Lokalitäten u vom Ässe gsy.

Die erschti Tanzüebig im 2013 isch am 21. Januar gsy. Jedes Jahr freuie mir üs uf dä Tag da mir üs aui wieder dörfe gseh u mir si geng voer Elan öbis neuis z'Lehre.

Delegierteversamlig Region Mittelland het das Jahr am 22. März z'Bäup stattgfunge. Dert isch Silvia drbi gsy. Bi eim Thema vo däm Abe isches ums schwizerische Voukstanzfescht z'Chur gange.

Ä grosse Alass für üsi Tanzgruppe isch am 5. April gsy, de denn hei mir z Regionauträfte düre g'führt. Da chöme jewius aui Tanzgruppe vor Region Gürbetau u vom Längebärg. Zu de Trachtetanz hei üs Ländlerkapäue Ulmizberg begleitet. Zum Znüni hets viu schöni Turte, Cake u Sändwitsch gä wo mir aui sauber hei backe. Merci dene aune wo so fliessig hei backe, dene aune wo üs ghoufe hei dä Abe düre zführe u natürlech Merci viu mau dir Vreni Wiedmer für üs dürs Programm z'führe.

Z'Bott am 28. April hei z'Vreni Brönnimann u Kathrin Hirschi z'Langethau bsuecht.

O i däm Jahr häts im Casino z'Bärn ä festliche Tanzabe gä. Da aber a däm Abe z Bärn dr Grossalass „Tanz dich frei“ het stattgfunge hei mir üs us Siecherheitsgründ entschiede, dass mir a däm Abe nit teilnäh.

Am 15.+16. Juni hets schwizerische Voukstanzfescht in Chur stattgfunge. Uf das Fescht hei mir üs scho lang g'freuit. Vo Uettligen us si mir gmeinsam mit angerne Trachtegruppe Richtig Passugg wo üsi Ungerkunft isch gsy gfare. Dr letscht bitz vo üsere Reis isch immer kurviger worde, so das dr Car eifach nüm isch wieder cho. De isch üs nüt angersch übrig bliebe aus üses Köfferli z'packe u z'Fuss,. wohuverstange i de Tanzschuh dr Wuat uf z'loufe. Wo mir du düre gschwitzt bi üsere Unterkunft a cho si hei mir üses sächser Zimmer entgäge gno. Nähr isches grad sofort mitem Car Richtig Chur ads Tanzfescht gange. Dert si viu Tänz vom isige Bestand tanzt worde. Dr ganz Tag isches so heiss gsy, dass mir sogar Füäss im Brunne hei müässe ga abkühle. Grosses Glück a däm Wuchenänd het Kathrin Peter gah. Bimne Fähutritt het sie sich dr Fuss verstucht. Si het nähr dr Samariterposte ufgsuecht. Dert isch si bir lagerig abem Bank geheit, sodass sie nähr nit nume am Fuäss Schmärze het gha. Wo mir spät am Abe du ändlech üsi Bushautesteu hei gfnunge, hei mir no sehr lang ufe Bus müässe warte. Zum Dessert hei mit du ou den dr letscht Bitz ume düre fiester Waud müässe loufe. Si auso scho froh gsy, hei mir ä Taschelampe drbi gha.

Silvia isch i dere Nacht nit so zur Ruh cho, da grad beidi näbe ihre g'schnarchlet hei. Ou am Sunnti hei mir wieder viu dörfe erläbe, lache u tanze. So isches wunderschöns Wuchenänd zänd gange.

Am 27. Oktober isch ume z'jährleche Tanzleiterträge z'Gümlige düre grührt worde.

Am 5. November het üses Ehremitglied Lydia Fahrni ihre 75-igste Geburtstag dörfe fyre. Bimne feine z'Vieri umne Glas Wy hei mir uf ihres Jubiläum a'gstosse. Ihre wünsche mir no eis aues, aues Guete.

Ou das Jahr möchte mir Tanzfroue dir Vreni u dir Brigitta ganz, ganz härzlech Merci säge für di enormi Gedud wo dir geng für üs ufbringt. Merci euich zwöine ganz härzlech!